



ADMINISTRACIÓN LOCAL

MUNICIPAL

CEE

Aprobación definitiva da modificación da Ordenanza reguladora das relacións de convivencia e ocio no uso de espazos públicos no Concello de Cee. Expte.: 2025/G014/000003

ANUNCIO

O Pleno do Concello de Cee, na sesión ordinaria realizada o día 4 de xullo de 2025, acordou a aprobación inicial da MODIFICACIÓN DA ORDENANZA REGULADORA DAS RELACIÓNS DE CONVIVENCIA E OCIO NO USO DE ESPAZOS PÚBLICOS NO CONCELLO DE CEE.

O devandito acordo da aprobación inicial someteuse ao trámite de información pública e audiencia dos interesados, con publicación no *Boletín Oficial da Provincia* e taboleiro de anuncios do Concello, polo prazo de trinta días para que puidesen examinar o expediente e presentar reclamacións ou suxestións.

Debido a que non se presentaron reclamacións ou suxestións no mencionado prazo, considérase aprobada definitivamente a modificación da Ordenanza reguladora das relacións de convivencia e ocio no uso de espazos públicos no Concello de Cee, sen necesidade de acordo expreso polo Pleno.

Publícase a continuación o texto íntegro da devandita ordenanza para os efectos da súa entrada en vigor:

“MODIFICACIÓN ORDENANZA REGULADORA DAS RELACIÓNS DE CONVIVENCIA E OCIO NO USO DE ESPAZOS PÚBLICOS NO CONCELLO DE CEE

EXPOSICIÓN DE MOTIVOS

O obxectivo principal desta Ordenanza é o de preservar o espazo público como un lugar de convivencia e civismo, no que todas as persoas poidan desenvolver en liberdade as súas actividades de libre circulación, de ocio, de encontro e de recreo, con pleno respecto á dignidade e aos dereitos dos demais e á pluralidade de expresións e de formas de vida diversas existentes no Concello de Cee. Súmase pois, e nalgúns aspectos actualízase e mellórase, ás previsións xa contidas na Ordenanza vixente, e que se refiren tamén, dunha maneira ou outra, e desde diversas vertentes, ao complexo fenómeno da convivencia.

A Ordenanza pretende ser unha ferramenta efectiva para facer fronte ás novas situacións e circunstancias que poden afectar á convivencia ou alterala e que, ao igual que en calquera outro concello europeo, se están a producir ultimamente en Cee, nun mundo cada vez máis globalizado. Intenta ser unha resposta democrática e equilibrada a estas novas situacións e circunstancias, baseándose, por un lado, no recoñecemento do dereito de todos a comportarse libremente nos espazos públicos e a ser respectados na súa liberdade; pero, por outro lado, tamén, na necesidade de que todos asumamos determinados deberes de convivencia e de respecto á liberdade, a dignidade e os dereitos recoñecidos aos demais, así coma ao mantemento do espazo público en condicións axeitadas. E, todo iso, ademais, sendo conscientes de que, para o logro destes obxectivos, non basta co exercicio, por parte da autoridade municipal, da potestade sancionadora, que en ocasións tamén é necesario, senón que cómpre, tamén, que o Concello leve a cabo as correspondentes actividades de fomento e de prestación social necesarias para promover os valores de convivencia e o civismo na cidade e para atender convenientemente ás persoas que o poidan necesitar. Neste sentido, pois, e como non podería ser doutro modo, o Concello debe ser o primeiro en dar cumprimento á Ordenanza.

Desde o punto de vista material, esta Ordenanza actúa dentro do ámbito de competencias de que dispón o Concello de Cee co fin de evitar todas as condutas que poidan perturbar a convivencia e minimizar os comportamentos incívicos que se poidan realizar no espazo público. Ten, así pois, unha natureza claramente transversal, ao afectar a un bo número de competencias locais e atravesar literalmente gran parte da estrutura de responsabilidades políticas e do sistema administrativo municipal. O fundamento xurídico da Ordenanza encóntrase, en primeiro lugar, na Constitución do ano 1978, sobre todo desde a perspectiva da garantía da autonomía municipal.

Máis tarde, os artigos 139 a 141 da Lei 7/1985, de 7 de abril, Reguladora das Bases de réxime local, introducido pola Lei 57/2003, de 16 de decembro, recolle tamén, expresamente, un título competencial en virtude do cal se establece a posibilidade de que os concellos, para a adecuada ordenación das relacións sociais de convivencia de interese local e do uso dos seus servizos, equipamentos, infraestruturas, instalacións e espazos públicos, en defecto de normativa sectorial

específica, poidan establecer os tipos das infraccións e impoñer sancións polo incumprimento de deberes, prohibicións ou limitacións. En todo caso, todas estas previsións configuran unha cobertura legal suficiente para cumprir a reserva legal do mandato de tipificación e dar resposta completa ao artigo 25.1 da Constitución Española.

CAPÍTULO I. PRINCIPIOS XERAIS

Artigo 1. -Fundamento da regulación

A presente ordenanza fundaméntase na protección da salubridade e a saúde pública, o respecto ao medio e o dereito á intimidade, descanso e tranquilidade dos veciños e veciñas.

Recoñécese así mesmo o dereito dos cidadáns a facer uso dos espazos públicos, sen máis limitacións que as impostas polas normas de aplicación e as derivadas do respecto aos principios e dereitos anteriormente mencionados.

Artigo 2. -Obxecto da regulación.

1. A presente ordenanza ten por obxecto regular o uso dos espazos públicos polos veciños, evitando unha utilización abusiva e excluínste destes que perturbe a normal convivencia cidadá.

2. Enténdese como convivencia cidadá para estes efectos:

a) O dereito das persoas ao descanso nocturno regulado polas disposicións locais, autonómicas e estatais vixentes en materia de contaminación acústica no relativo á superación dos valores límites de emisión e inspiración, así como os obxectivos de calidade acústica aplicables a cada zona, sendo de aplicación a Ordenanza ambiental reguladora da emisión e recepción de ruídos e vibracións, o DECRETO 106/2015, de 9 de julio, sobre contaminación acústica de Galicia, así como a Lei 37/2003, do ruído, e as súas disposicións complementarias.

b) O cumprimento de calquera normativa a vulneración da cal contraveña o respecto aos principios e dereitos enunciados no capítulo 1 desta ordenanza.

3. Para conseguir o disposto nos apartados precedentes, o Concello de Cee adoptará as seguintes medidas:

- Fomentará o diálogo con organizacións xuvenís, de pais e nais, veciñais, etc, co fin de exercer un labor preventivo entre os mozos no uso moderado do alcohol e no respecto ao ámbito e á veciñanza.

- Realizará un labor preventivo en centros educativos, en colaboración coas Consellerías de Educación e Sanidade de la Xunta de Galicia.

- Realizará campañas sobre o consumo responsable de alcohol e convivencia cívica e social.

4. O Concello prohíbe e consecuentemente impedirá, as concentracións de persoas na vía pública que alteren a normal convivencia cidadá, sempre que se leven a cabo condutas que perturben o dereito das persoas ao descanso nocturno, entre as 22.00 e as 8.00 horas.

Exceptúase do disposto no parágrafo anterior as manifestacións populares debidamente autorizadas, así como outras datas e festas patronais ou populares.

Os establecementos de hostalaría, incluídos os espazos ao aire libre anexos a estes, rexeranse pola súa propia normativa de aplicación.

5. De conformidade coa Lei 11/2010 de 17 de decembro de prevención do consumo bebidas alcohólicas a menores, está prohibido a venda ou subministración de bebidas alcohólicas a menores de idade.

Artigo 3- Das infraccións.

1. As infraccións contra a presente ordenanza clasifícanse en moi graves, graves e leves.

2. Constitúen infraccións moi graves as que supoñan:

a. a) Unha perturbación da convivencia que afecte de xeito grave, inmediata e directa, á tranquilidade ou ao exercicio de dereitos lexítimos doutras persoas ou ao normal desenvolvemento de actividades de toda clase nos termos regulados nos artigos 2.2 e 2.4 desta Ordenanza ou á salubridade ou ornato públicos e cando iso se derive da concentración de persoas na vía pública nas que se consuma ou non alcohol, entre as 22 horas e as 8 horas.

b. b) O incumprimento das ordes, sinalizacións, etc. relativas a espazos de especial protección ou requirimentos formulados polas autoridades municipais ou os seus axentes en directa aplicación do disposto nesta ordenanza.

c. c) O impedimento do uso dun Servizo Público por outra ou outras persoas con dereito á súa utilización.

d. d) O impedimento ou a grave e relevante obstrución ao normal funcionamento dun Servizo público.

e. e) Os actos de deterioración grave e relevante de equipamentos, infraestruturas, instalacións ou elementos dun Servizo Público.

f. f) O impedimento do uso dun Espazo Público por outra ou outras persoas con dereito á súa utilización.

g. g) Os actos de deterioración grave e relevante de espazos públicos ou de calquera das súas instalacións e elementos, sexan mobles ou inmoables, non derivados de alteracións da seguridade cidadá.

h) A comisión de dúas faltas graves no prazo dun ano cando se sancionou a primeira delas por resolución asine en vía administrativa.

3. Constitúen infraccións graves:

a) As concentracións de persoas na vía pública que afecten negativamente á convivencia cidadá entre as 22 e as 8 horas e non poidan ser incluídas no apartado 2.a) do anterior.

b) A mera obstrución ao normal funcionamento dos servizos públicos.

c) A obstrución ao labor dos inspectores ou axentes da autoridade.

d) A realización de actos que ocasionen estragos ou danos ao mobiliario ou equipamentos urbanos que impidan o seu normal uso, facéndooos inservibles para este ou cando o custo de reparación sexa superior en máis dun 30% do valor de mercado do devandito mobiliario ou equipamento.

e) Actos que ocasionen estragos ou danos a elementos de ornato público, tales como estatuas, de forma que desvirtúen a súa normal contemplación.

4. Constitúen infraccións leves:

a) A realización de actos que ocasionen estragos ou danos ao mobiliario ou equipamentos urbanos pero que non impida o seu uso.

b) A utilización do mobiliario urbano para usos distintos á súa finalidade.

c) Pisar as zonas axardinadas, ou atentados contra a flora urbana.

d) Obstruír o acceso aos portais veciñais ou a entrada a garaxes públicos ou privados de forma que se impida a súa normal utilización.

e) Timbrar indiscriminadamente nos portais de edificios de forma que se impida o descanso nocturno.

f) Pegar patadas a residuos ou elementos sólidos existentes en vía pública de forma que produzan notable afección acústica.

Artigo 4- Zonas de Especial Protección.

O Concello, por acordo da Xunta de Goberno Local, poderá declarar determinados espazos públicos como zonas de especial protección naqueles casos en que as concentracións reiteradas de persoas nestes produzan unha moi grave perturbación da convivencia cidadán definido pola conxunción dos artigos 2.2. e 2.4 desta norma.

Para iso é necesario que concorran acumulativamente as seguintes circunstancias obxectivas:

. Uso abusivo do espazo público continuado no tempo, polo que non se terán en conta as concentracións de persoas de carácter ocasional ou puntual.

. O número elevado de persoas concentradas no mesmo con relación á densidade de vivendas e veciños do lugar ou espazo público do que se trate.

. Informes municipais previos relativos á vulneración reiterada dos niveis sonoros permitidos no interior das vivendas, actos vandálicos producidos na zona, custos económicos invertidos polo Concello para a devolución dese espazo público ao seu uso común e xeral.

Unha vez declaradas, serán debidamente sinalizadas, polo que se impedirá a concentración de persoas nestas no horario de descanso nocturno fixado na ordenanza.

O Concello elaborará cada 6 meses, informe público de seguimento da zona declarada como de especial protección aos efectos de manter ou non a prohibición acordada.

Artigo 5- Das sancións.

As infraccións anteriores sancionaranse conforme ao seguinte baremo:

- Infraccións moi graves, multa de 1.501 ata 3.000 euros.

- Infraccións graves, multa de 751 ata 1.500 euros.

- Infraccións leves, multa de 200 ata 750 euros.

Artigo 6. - Criterios para a graduación da sanción.

Para a determinación das sancións previstas nesta Ordenanza terase en consideración o principio de proporcionalidade e, en todo caso, os seguintes criterios de graduación:

- a) A intensidade da perturbación ocasionada na tranquilidade ou no pacífico exercicio dos dereitos doutras persoas ou actividades.
- b) A intensidade da perturbación causada á salubridade ou ornato públicos.
- c) A intensidade da perturbación ocasionada no uso dun Servizo ou dun espazo público por parte das persoas con dereito a utilizalos.
- d) A intensidade da perturbación ocasionada no normal funcionamento dun Servizo público.
- e) A intensidade dos danos ocasionados aos equipamentos, infraestruturas, instalacións ou elementos dun servizo ou dun espazo público.
- f) A comisión de dúas faltas leves no prazo dun ano cando se sancionou a primeira delas por resolución asine en vía administrativa.

Artigo 7- Intervencións específicas

Nos supostos recollidos nos artigos anteriores, os axentes da autoridade retirarán e intervirán cautelarmente as bebidas, os envases ou os demais elementos afectados á infracción cometida.

Artigo 8- Responsabilidade das infraccións.

1. Só poderán ser sancionadas por feitos que poidan constituír infraccións ao disposto nesta Ordenanza, as persoas físicas e as xurídicas que resulten responsables delas.
 2. En caso de que unha vez practicadas as dilixencias de investigación oportunas tendentes a individualizar a responsabilidade dos infractores non fose posible determinar o grao de participación dos diversos suxeitos que interveñan na comisión da infracción, a súa responsabilidade será solidaria.
 3. A responsabilidade civil será esixible dos pais ou nais ou persoas que resulten legalmente responsables dos menores de idade polos danos e prexuízos que se deriven das accións dos menores de idade.
- En todo caso, os pais, nais, ou persoas que resulten legalmente responsables recibirán comunicación das infraccións cometidas polos menores de idade ao seu cargo. Así mesmo, tamén se poderá dar traslado desa comunicación, ao órgano competente en menores da Xunta de Galicia.

Artigo 9- Feitos constatados por axentes da autoridade.

Nos procedementos sancionadores que se instrúan en aplicación desta Ordenanza, os feitos constatados polos axentes da autoridade teñen valor probatorio, sen prexuízo das probas que poidan achegar os interesados.

Dos feitos constatados polos axentes da autoridade, que poidan integrar unha infracción da que a competencia vinga atribuída por lei a outras administracións - estatal ou autonómica - procederase a levantar atestado ou denuncia dos feitos que serán remitidos á autoridade competente.

Artigo. 10- Destino e substitución das sancións.

1. As sancións económicas impostas pola comisión de infraccións graves e leves poderán ser suspendidas:
 - a) Se o infractor acepta a realización de traballos ou actividades en beneficio da comunidade establecidos polo Concello.
 - b) Se o infractor participa nos cursos que o Concello determine e que puidesen impartirse sobre a prevención do consumo de alcohol e coñecemento dos seus efectos sobre a saúde, así como sobre prevención dos efectos vandálicos co fin de propiciar a axeitada convivencia cidadá.

Artigo 11- Procedemento de suspensión e relevo das sancións.

- 1) A autoridade competente para incoar e resolver os expedientes de suspensión das sancións, así como para decidir a finalización da suspensión, será a mesma que impuxo a sanción.
- 2) O procedemento incoarase cando o infractor manifieste, mediante a correspondente solicitude, a súa vontade de realizar traballos ou actividades en beneficio da comunidade ou a súa participación en cursos de conformidade co establecido no artigo anterior.
- 3) Se se resolve favorablemente a suspensión pola autoridade competente quedará automaticamente suspendido o prazo de prescrición da sanción polo tempo previsto de duración dos traballos, actividades ou cursos.

4) Durante o tempo de suspensión, a autoridade competente poderá efectuar o seguimento que considere oportuno sobre as asistencias e resultados nas tarefas correspondentes.

5) Cando da información reunida se deduza que o infractor seguiu satisfactoriamente os cursos establecidos ou os traballos ou actividades en beneficio da comunidade, nos termos que regulamentariamente se establezan, a autoridade competente acordará a remisión total ou parcial da sanción ou sancións impostas.

O incumprimento total ou parcial das medidas substitutorias ou a comisión dunha nova infracción das tipificadas nesta ordenanza determinarán que a autoridade competente resolva a continuación do expediente de execución da sanción.

Artigo 12. Atribución de competencias sancionadoras

1. A competencia para sancionar as infraccións contidas nesta Ordenanza corresponde, a alcaldía (Art.21.n LBRL), podendo delegar a mesma nos termos previstos na lei.

2. A atribución de competencias a que se refiren o apartado anterior non afecta ao exercicio da potestade sancionadora que poida corresponder a outras Administracións por razón das competencias que teñan atribuídas.

3. A potestade para acordar as sancións accesorias establecidas nesta Lei corresponderá a quen a ostente para impoñer as de carácter principal das que deriven aquelas.

CAPÍTULO II.- Degradación visual da contorna urbana

Artigo 13. Fundamentos da regulamentación

1. A regulamentación contida neste capítulo fundaméntase no dereito a gozar da paisaxe urbana da cidade, que é indisoluble do correlativo deber de mantelo en condicións de limpeza, pulcritude e decoro.

2. Os grafitos, as pintadas e outras condutas de ensuciado e feísmo non só desvalorizan o patrimonio público ou privado e poñen de manifesto o seu deterioro, senón que principalmente provocan unha degradación visual da contorna, que afecta á calidade de vida da veciñanza e das persoas visitantes.

3. O deber de absterse de lixar, manchar e deslucir a contorna encontra o seu fundamento na evitación da contaminación visual, e é independente e por tanto compatíbel coas infraccións, incluídas as penais, baseadas na protección do patrimonio, tanto público coma privado.

SECCIÓN 1ª. GRAFITOS, PINTADAS E OUTRAS EXPRESIÓNS GRÁFICAS

Artigo 14. Normas de conduta

1. Está prohibido realizar todo tipo de grafito, pintada, mancha, garabato, escrito, inscrición ou grafismo, con calquera materia (tinta, pintura, materia orgánica ou similares) ou ben raiando a superficie, sobre calquera elemento do espazo público, así coma no interior ou exterior de equipamentos, infraestruturas ou elementos dun servizo público e instalacións en xeral, incluídos transporte público, equipamentos, mobiliario urbano, árbores, xardíns e vías públicas en xeral e o resto dos elementos descritos nesta Ordenanza. Quedan excluídos os murais artísticos que se realicen con autorización do propietario ou con autorización municipal (muros de arte urbano).

2. Cando o grafito ou a pintada se realice nun ben privado que se encontre instalado de maneira visíbel ou permanente na vía pública, necesitarase, tamén, a autorización expresa do Concello.

3. As persoas organizadoras de calquera acto público de natureza cultural, festiva, lúdica ou deportiva, ou de calquera outra índole, velarán porque non se produzan, durante a súa celebración, condutas de degradación visual do espazo utilizado. Se con motivo de calquera destes actos se producen as condutas descritas no apartado primeiro deste artigo, os seus organizadores deberán comunicalo inmediatamente aos axentes da autoridade.

4. Sen prexuízo da responsabilidade civil subsidiaria das nais, pais ou persoas titoras ou gardadoras polas accións dos menores de idade que dependan deles, aqueles serán tamén responsábeis directos e solidarios das infraccións descritas neste artigo cometidas polos menores que se encontren baixo a súa tutela, sempre que, pola súa parte, conste dolo, culpa ou negligencia, incluída a simple inobservancia.

Artículo 15. Réxime de sancións

1. A realización das condutas descritas no artigo precedente terá a consideración de infracción leve, e será sancionada con multa de 120 até 750 EUR, agás que o feito constituía unha infracción máis grave.

2. Terán a consideración de infraccións graves, sancionábeis con multa de 750,01 a 1.500 EUR, as pintadas ou os grafitos que se realicen:

a) Nos elementos do transporte, xa sexan de titularidade pública ou privada, e, no primeiro caso, municipal ou non, incluídos os vehículos, as paradas, as marquesiñas e demais elementos instalados nos espazos públicos.

b) Nos elementos dos parques e xardíns públicos.

c) Nas fachadas dos inmobles, públicos ou privados, lindeiros, agás que a extensión da pintada ou o grafito sexa case inapreciábel.

d) Nos sinais de tráfico ou de identificación viaria, ou de calquera elemento do mobiliario urbano, cando implique a non utilización ou perda total ou parcial de funcionalidade do elemento.

3. As infraccións terán o carácter de moi grave, e serán sancionadas con multa de 1.500,01 a 3.000 EUR, cando se atente especialmente contra o espazo urbano por realizarse sobre monumentos ou edificios catalogados ou protexidos.

Artigo 16. Intervencións específicas

1. Nos supostos recollidos nos artigos anteriores, os axentes da autoridade retirarán e intervirán con cautela os materiais ou medios empregados.

2. Se polas características da expresión gráfica, o material empregado ou o ben afectado fora posíbel a limpeza e a restitución inmediata ao seu estado anterior, os axentes da autoridade cominarán persoalmente á persoa infractora a que proceda á súa limpeza, sen prexuízo da imposición das sancións que correspondan pola infracción cometida.

3. O Concello, subsidiariamente, poderá limpar ou reparar os danos causados pola infracción, con cargo á persoa ou persoas responsábeis e sen prexuízo da imposición das sancións correspondentes. O Concello resarcirase dos gastos que ocasione a limpeza ou reparación, sen prexuízo tamén da imposición das sancións oportunas.

SECCIÓN 2ª. PANCARTAS, CARTEIS E FOLLETOS

Artículo 17. Normas de conduta

1. A colocación de carteis, valos, rótulos, pancartas, adhesivos, papeis pegados ou calquera outra forma de publicidade, anuncio ou propaganda deberá efectuarse unicamente nos lugares expresamente habilitados para o efecto pola autoridade municipal. Está prohibida a colocación de carteis e pancartas en edificios e instalacións municipais, en calquera espazo público ou elemento da paisaxe e o mobiliario urbano ou natural, sen autorización expresa do Concello.

2. Igualmente, necesitarase autorización expresa do Concello, ademais da do titular do ben afectado, cando o cartel ou a pancarta se instale nun ben privado se voa sobre o espazo público, excluídas as pancartas en balcóns e outras aberturas.

3. As persoas titulares da autorización serán responsábeis da retirada dos elementos instalados e de repoñer os elementos ao seu estado anterior, de acordo coas indicacións que dean os servizos municipais.

4. Prohíbese esgazar, arrincar e tirar ao espazo público carteis, anuncios, pancartas e obxectos similares.

5. Prohíbese colocar publicidade sobre a parte exterior dos cristais dos vehículos, así coma espaxer e tirar toda clase de folletos ou papeis de publicidade comercial ou calquera material similar na vía pública e nos espazos públicos e outros espazos definidos nesta Ordenanza.

6. As persoas que reparten publicidade domiciliaria non poderán deixar propaganda fóra do recinto da portería dos edificios.

7. As persoas físicas ou xurídicas que promovan a contratación ou difusión da mensaxe responderán directa e solidariamente das infraccións precedentes cos autores materiais do feito.

Artigo 18. Réxime de sancións

1. Os feitos descritos no artigo anterior serán constitutivos de infracción leve, e sancionados con multa de 120 a 750 EUR.

2. Terán, non obstante, a consideración de infraccións graves a colocación de carteis, pancartas ou adhesivos en edificios e instalacións municipais, no mobiliario urbano ou natural, e en xeral, en todos aqueles elementos que, situados no espazo público, estean destinados a prestar servizos específicos á cidadanía. Nestes casos, a infracción será sancionada con multa de 750,01 a 1.500 EUR.

3. Cando as infraccións precedentes se realicen sobre monumentos ou edificios catalogados ou protexidos, terán a consideración de moi graves, e serán sancionadas con multa de 1.500,01 a 3.000 EUR. Terá a mesma consideración e o importe da multa será o mesmo cando a colocación de carteis, pancartas ou adhesivos se faga en sinais de tráfico de maneira que imposibilite unha correcta visión por parte das persoas condutoras e/ou peóns.

Artigo 19. Intervencións específicas

1. Nos supostos recollidos nos anteditos artigos, os axentes da autoridade retirarán e intervirán con cautela os materiais ou medios empregados.

2. Así mesmo, cominarán persoalmente á persoa infractora a que proceda a retirar o material e reparar os danos efectuados pola súa colocación, sen prexuízo das sancións que corresponda impoñer pola infracción cometida.

3. O Concello poderá adoptar a medida de cautela de retirada dos elementos de propaganda ou publicidade con cargo á persoa responsábel, sen prexuízo da imposición das sancións correspondentes.

CAPÍTULO III.- Uso inadecuado do espazo público para xogos

Artigo 20. Fundamentos da regulamentación

1. A regulamentación contida neste capítulo fundaméntase na liberdade de circulación das persoas, na protección dos peóns e no dereito que todas as persoas teñen a non seren perturbadas no seu exercicio e a gozaren de xeito lúdico dos espazos públicos consonte a natureza e o destino destes, respectando as indicacións contidas nos rótulos informativos do espazo afectado, de existiren, e en calquera caso os lexítimos dereitos dos demais usuarios ou usuarias.

2. A práctica de xogos de pelota, monopatín ou similares no espazo público está sometida ao principio xeral de respecto aos demais, e, en especial, da súa seguridade e tranquilidade, así coma ao feito de que no impliquen perigo para os bens, servizos ou instalacións, tanto públicos coma privados.

Artigo 21. Normas de conduta

1. Prohíbese a práctica de xogos no espazo público e de competicións deportivas masivas e espontáneas que perturben os lexítimos dereitos da veciñanza ou das demais persoas usuarias do espazo público.

2. Está especialmente prohibida a práctica de xogos con instrumentos ou outros obxectos que poidan poñer en perigo a integridade física das persoas usuarias do espazo público, así coma a integridade dos bens, servizos ou instalacións, tanto públicos coma privados.

3. Sen prexuízo das infraccións previstas na Ordenanza sobre Circulación de Peóns e de Vehículos, non está permitida a práctica de acrobacias e xogos de habilidade con bicicletas, patíns ou monopatíns fóra das áreas destinadas para tal efecto. Queda prohibida a utilización de escaleiras para peóns, elementos para a accesibilidade de persoas con eivas, varandas, bancos, pasamáns, ou calquera outro elemento do mobiliario urbano para realizar acrobacias con patíns e monopatíns.

4. Prohíbese xogar á pelota e ao balón nos lugares onde exista unha prohibición expresa, a través dos carteis informativos colocados polo Concello.

Artigo 22. Réxime de sancións

1. Os axentes da autoridade limitaranse a lembrarlle a estas persoas que ditas prácticas están prohibidas pola presente Ordenanza. Se a persoa persistise na súa actitude poderá ser sancionada de acordo co apartado seguinte.

2. O incumprimento das normas previstas no antedito artigo considerarase infracción leve e será sancionada con multa de 120 até 750 EUR, agás que o feito constituía unha infracción máis grave.

3. Terán, sen embargo, a consideración de infraccións graves, e serán sancionadas con multa de 750,01 a 1.500 EUR:

a) A práctica de xogos que impliquen un risco relevante para a seguridade das persoas ou os bens, e, en especial, a circulación temeraria con patíns ou monopatíns por beirarrúas ou lugares destinados a peóns.

b) A utilización de elementos ou instalacións arquitectónicos ou do mobiliario urbano para a práctica do monopatín, patíns ou similares cando se poñan en perigo de deterioro.

Artigo 23. Intervencións específicas

1. Tratándose da infracción consistente na práctica de xogos no espazo público, os axentes da autoridade procederán á intervención con cautela dos medios empregados.

2. Igualmente, no caso das infraccións graves previstas no apartado segundo do artigo anterior, os axentes intervirán con cautela o xogo, monopatín, patín ou similar co que se teña producido a conduta.

CAPÍTULO IV.- Medidas de policía administrativa

Artigo 24. Ordes singulares da Alcaldía para a aplicación da Ordenanza

1. A Alcaldía pode ditar as ordes singulares ou nominativas e as disposicións especiais que procedan sobre a conduta na vía pública ou o comportamento da cidadanía, co fin de facer cumprir a normativa en materia de convivencia cidadá e de civismo.

2. Sen prexuízo da imposición da sanción que no seu caso corresponda, a Alcaldía poderá tamén requirir ás persoas que sexan achadas responsábeis dalgunha das condutas descritas nesta Ordenanza para que se absteñan no futuro de realizaren actuacións similares dentro do termo municipal.

3. O incumprimento das ordes, as disposicións ou os requirimentos anteditos nos apartados 1 e 2 deste artigo será sancionado nos termos previstos nesta Ordenanza, sen prexuízo de que se poida iniciar procedemento penal por causa de desobediencia.

CAPÍTULO V.- Medidas de policía administrativa directa

Artigo 25. Medidas de policía administrativa directa

1. Os axentes da autoridade esixirán en todo momento o cumprimento inmediato das disposicións previstas nesta Ordenanza, e, sen prexuízo de proceder a denunciar as condutas antixurídicas, poderán requirir verbalmente ás persoas que non respecten as normas para que desistan na súa actitude ou comportamento, advertíndoas de que en caso de resistencia poden incorrer en responsabilidade criminal por desobediencia.

2. Cando a infracción cometida provoque, ademais dunha perturbación da convivencia cidadá e do civismo, un deterioro do espazo público, requirirase ao seu causante para que proceda á súa reparación, restauración ou limpeza inmediatas, cando sexa posíbel.

3. No caso de resistencia a estes requirimentos, e sen prexuízo do que se dispón no apartado 1 deste artigo, as persoas infractoras poderán ser desaloxadas, cumprindo en todo caso co principio de proporcionalidade.

4. Para os efectos de poder incoar o correspondente procedemento sancionador, os axentes da autoridade requirirán á persoa presuntamente responsábel para que se identifique. De non conseguirse a identificación por calquera medio da persoa que cometeu unha infracción, os axentes da autoridade poderán requirila para que, ao obxecto de iniciar o expediente sancionador da infracción cometida, os acompañe a dependencias próximas que contén con medios adecuados para realizaren as dilixencias de identificación, para estes únicos efectos e polo tempo imprescindíbel, informándolle á persoa infractora dos motivos do requirimento de acompañamento.

CAPÍTULO VI.- Medidas provisionais

Artigo 26. Medidas provisionais

1. Iniciado o expediente sancionador, mediante acordo motivado, poderanse adoptar as medidas provisionais imprescindíbel para o normal desenvolvemento do procedemento, para evitar a comisión de novas infraccións ou para asegurar o cumprimento da sanción que puidese impoñerse. Estas medidas poderán consistir en calquera das previstas na normativa xeral e sectorial aplicábel en cada caso, e deberán ser proporcionadas á natureza e á gravidade da infracción.

2. Cando a Lei así o prevexa, as medidas provisionais poderanse adoptar tamén con anterioridade á iniciación do expediente sancionador.

3. En materia de medidas provisionais nos casos de infraccións cometidas por persoas estranxeiras non residentes no territorio español, deberánse ter en conta as disposicións especiais de procedemento (Cando a persoa infractora non acredite a súa residencia habitual en territorio español, o axente que formule a denuncia ofreceralle a posibilidade de facer inmediatamente efectiva a sanción. Se a sanción non fose satisfeita, o órgano competente, mediante acordo motivado, adoptará inmediatamente como medida de cautela o ingreso dunha cantidade económica que represente o mínimo da sanción económica prevista e, cando a Ordenanza non fixe o importe mínimo da mesma, o importe mínimo que se aplicará nestes casos será do setenta e cinco por cento do seu máximo. Esta medida provisional seralle notificada con carácter urgente á dirección na que aquela persoa estea a vivir na cidade ou na localidade correspondente. No suposto de que non se proceda ao ingreso desta cantidade, advertiráselle, de proceder, que podería incorrer en responsabilidade penal.)

Artigo 27. Comisos

1. Ademais dos supostos en que así se prevexa expresamente nesta Ordenanza, os axentes da autoridade poderán, en todo caso, comisar os utensilios e o xénero obxecto da infracción ou que serviron, directa ou indirectamente, para a comisión daquela, así coma o diñeiro, os froitos ou os produtos obtidos coa actividade infractora, os cales quedarán baixo a custodia municipal mentres sexa necesario para a tramitación do procedemento sancionador ou, a falta deste, mentres perduren as circunstancias que motivaron o comiso.

2. Os gastos ocasionados polo comiso correrán a cargo do causante das circunstancias que o determinaron.

3. De tratarse de bens funxibles, destruíranse ou daráselles o destino adecuado. Os obxectos comisados depositaranse a disposición do órgano sancionador competente para a resolución do expediente. Unha vez ditada resolución firme e transcorridos dous meses sen que o titular tivese recuperado o obxecto, procederase á súa destrución ou entregárase gratuitamente a entidades sen ánimo de lucro con finalidades sociais.

CAPÍTULO VII.- Medidas de ejecución forzosa**Artigo 28. Multas coercitivas**

Para a execución forzosa das resolucións, o Concello poderá impoñer multas coercitivas, de acordo co disposto na lexislación sectorial.

Artigo 29. Multas coercitivas

Para a execución forzosa das resolucións, o Concello poderá impoñer multas coercitivas, de acordo co disposto na lexislación sectorial.

DISPOSICIÓN DEROGATORIA

Coa aprobación desta Ordenanza queda derogada a existente.

DISPOSICION FINAL.-Entrada en vigor.

Esta Ordenanza publicárase no Boletín Oficial da Provincia da Coruña, entrando en vigor de acordo co establecido nos artigos 65.2 e 70.2 da Lei 7/1985, de 2 de abril, Reguladora das Bases de Réxime Local, e permanecendo en vigor até que non se acorde a derogación ou modificación expresa.”

Cee, 8 de setembro de 2025

A alcaldesa

Asdo. Margarita Lamela Louzán

2025/5868